

LVCRETI DE RERVM NATVRA

quamquam multa bene ac divinitus invenientes
 ex adyto tam quam cordis responsa dedere
 sanctius et multo certa ratione magis quam
 Pythia quae tripodi a Phoebi lauroque profatur,
 principiis tamen in rerum fecere ruinas 740
 et graviter magni magno cecidere ibi casu.

Primum quod motus exempto rebus inani
 constituunt et res mollis rarasque relinquunt
 aëra solem ignem terras animalia frugis
 nec tamen admiscent in eorum corpus inane; 745
 deinde quod omnino finem non esse secandis
 corporibus facient neque pausam stare fragori
 nec prorsum in rebus minimum consistere qui(cquam),
 cum videamus id extremum cuiusque cacumen
 esse quod ad sensus nostros minimum esse videtur, 750
 conicere ut possis ex hoc, quae cernere non quis
 extremum quod habent, minimum consistere (rerum).

Huc accedit item, quoniam primordia rerum
 mollia constituunt, quae nos nativa videmus
 esse et mortali cum corpore, funditus ut qui 755
 debeat ad nihilum iam rerum summa reverti
 de nihiloque renata vigescere copia rerum;
 quorum utrumque quid a vero iam distet habebis.

Deinde inimica modis multis sunt atque veneno
 ipsa sibi inter se; quare aut congressa peribunt 760
 aut ita diffugient, ut tempestate coacta
 fulmina diffugere atque imbris ventosque videmus.

Denique quattuor ex rebus si cuncta creantur
 atque in eas rursus res omnia dissoluuntur,